

Cauhbingz:

“Dangz Gangj Daudwz” Haeuj Ndaw Mbanj

昭平：“道德讲堂”进村屯

“Hauqgingq aeu vaiqdangq, ndang-genq gaej lumz aen……” Mboengqgonq, vihliux sawj vunz ndaw mbanj rox gangj vwnzmingz, gangj daudwz, rox hauqgingq bohme, gyoengq nungzminz Cauhbingz Yen Vwnzcuz Cin Mbanj Gveivah youq ndaw mbanj gawjhengz aen hozdung “Gozyoz haeuj fanh hoh” gangj daudwz ndeu.

Ciuq hozdung gveihding, moix boux vunz aeu guh daengz “haj diuz” lajneix, couhdwg: Ciengq diuz go ndeu, gangj aen gojgaeq ndeu, gangj coenz vah ndei ndeu, dapwngq guh gienh saeh ndeu, soengq faenh gitleih ndeu. Gyoengq vunzmbanj

bouboux cungj angq camgya hozdwng, daihgya langhsing ciengq diuz go 《Duzyiengz Gvih Gwn Cij》, hawj “dangz gangj daudwz” ciengz youq ndaw mbanj. Daihgya lij haengjheiq youq gwnz diuz hwngzfuz sij miz “guh boux vunz gaenx ndeu, guh boux vunz sienh ndeu” haenx ciem coh swheij, baujingq itdingh guh daengz.

(Liuz Feih)

► Gyoengq vunzmbanj youq gwnz diuz hwngzfuz sij miz “guh boux vunz gaenx ndeu, guh boux vunz sienh ndeu” haenx ciem coh.



Dava: Dang Lauxsae Youh Guh Bouxhajcawj

大化：亦厨亦师的山村老师

Geij ngoenz gonq, gicej bae daengz lajmbanj Dava Yauzcuz Swciyen caijfangj seiz rox daengz, gizde, miz mbanj siujyoz aenvih sizdangz hagseng bouxhajcawj noix, guh hong sizdangz guh mbouj gib, ndigah, lauxsae cawzliux hwnjdangz le lij doxlwnz bae sizdangz bang swiq byaek cawj haeux. Youq dieg runghlaeg haenx diuzgen engq ca lo, hagdangz mbouj miz sizdangz caeuq bouxhajcawj, cawx byaek, cawj haeux, swiq vanj, guh ngaizringz hawj hagseng gwn, cungj dwg youz lauxsae gag guh.

Vihliux gaijndei lajmbanj yivu gyauyuz zozyau hagseng gwnhaeux diuzgen, bi 2012, Swcigih caizcwng gaenq comzrom 19.48 ik maenz, yungh daeuj gaijndei hagdangz hagseng sizdangz. Hoeng, gij hagdangz youq dieg bienbik dieg rungh haenx, hagseng gwnyouq diuzgen lij gig ca, siengj aeu ndaej gaijndei diuzgen hoj neix, lij aeu byaij duenh loh haemq raez ndeu cij ndaej. (Sinhse)



▲ Dava Yauzcuz Swciyen Banjswngh Yangh Lungleiz Siujyoz Mungz Yingyangz lauxsae baen ngaizringz hawj hagseng.

◀ Lungyungj Siujyoz ngeihnienzgaep hagseng Mungz Senhdai youq ndaw gyausiz nyinhcaen guh cozyez.

Denzdungh: Makbohloz Ndaej Fungsou

田东：千亩蜜菠萝喜获丰收



▲ Nungzminz yinh Makbohloz bae gai.

Denzdungh Yen ginggvaq saedhengz aen guenjieix mozi moq doengjit gveihva, doengjit cungj binjcungj ndeu, doengjit gisuz neix le, bi 2012, cien moux reih makbohloz sifan gihdi sou ndaej makbohloz 3000 lai dun, ciuq hawciengz gai moix gaen song maenz ngaenz suenq, cungcanjceiz dabdaengz 600 lai fanh maenz, yienghneix, 120 hoh ndaem makbohloz haenx moix hoh souhaeuj 5 fanh lai maenz.

Cozdwng Yangh Dwngghauh Cunh Yenzyicangz dwg Denzdungh

Yen aen sifan gihdi ndaem makbohloz ceiq hung ndeu, gizneix namhbiz, ndit cuk, hab ndaem makbohloz, ndaem makbohloz gaenq miz 50 lai bi nanz lo. Hainduj, gyoengq nungzminz lingzsing ndaem di, aenvih mbouj rox dajndaem gisuz, canjlieng caeuq souik cungj gig daemq. Geij bi neix daeuj, cwngfuj saedhengz guenjieix mozi moq le, makbohloz canjyez fazcanj gig vaiq. Seizneix ndaw yenzyicangz ndaem makbohloz mienheik miz 1500 moux, moix moux ndaej sou 4000 lai gaen, makbohloz aen youh hung youh diemz, ndei gai raixcaix.

(Banh Yungjez)

Cingsih: Nungzminz Yisuzdonz Eu Fwen Senhconz “Cibbet Daih” Cingsaenz

靖西：农民艺术团山歌宣传“十八大”精神

Cingsih Yen Anhdwz Cin Nungzminz Yisuzdonz gag bien gag sij fwen, eu fwen daeuj senhconz dangj “Cibbet Daih” cingsaenz. Gyoengqde aeu diuh fwen Baihbaek Cingsih daeuj ciengq 《Eu Fwen Danqhaenh Aencingz Dangj》, ndeidingq dangqmaz, ndaej daengz gyoengq dangjyenz ganbu dieg haenx haenh ndei.

(Cingsi)



▲ Gyoengq cwngzyenz Nungzminz Yisuzdonz cingq langhsing eu fwen.